

ՔՆՆԱՐԿՈՒՄՆԵՐ

ԴԻՑԱՆՈՒՆԻՑ ՑԵՂԱՆՈՒՆ. ՄԻ ՀՆԱԳՈՅՆ ՊԱՇՏԱՄՈՒՆՔԻ ՀԵՏՔԵՐ ՀԱՅԱՍՏԱՆՈՒՄ

ԱՐՄԷՆ ՊԵՏՐՈՍԵԱՆ
alpehist@gmail.com

Հայոց ազգածին առասպելի համաձայն, Արարատեան Դաշտը առաջինը բնակեցնում է Հայկի որդի Արամանեակը (աւանդուած է նաեւ Արամանեակ, Արամենակ/Արմենակ տարբերակներով), իսկ նրա որդի Արամայիսը (տարբերակ՝ Արմայիս) այնտեղ կառուցում է հայոց առաջին մայրաքաղաքը եւ կոչում իր անունով՝ Արմաիր: Միքանի սերունդ անց սրանց ժառանգներից Արամը ընդարձակում է Հայաստանի սահմանները բոլոր կողմերից եւ հիմք դնում նոր, հզօր Հայաստանի, նորից կենտրոն ունենալով Արմաիրը¹:

Արմաիր անուանումն աւանդուած է յետուրարտական դարաշրջանից (յուն. Armaouira, լատ. Armavira, հին հայ. Արմաիր, սեռ. Արմաւրայ), բայց այն կարող է հնագոյն ծագում ունենալ², քանի որ անբացատրելի է հայերէն եւ հարեւան ժամանակակից լեզուներով: Ըստ ամենահաւանական ստուգաբանութեան, այն կարող է կապուել խեթերէն հիմքերի հետ՝ arma- «լուսին, լուսնաստուած» + pir «տուն», կրօնական ոլորտում՝ «աստծու տուն, տաճար» (որտեղ -ւն հին միջձայնաւորային -փ օրինաչափ զարգացումն է)³:

Մանրամասն քննութիւնը ցոյց է տալիս, որ Ար(ա)մայիսը, ամենայն հաւանականութեամբ, եղել է լուսնի աստուածութիւն⁴: Ընդ որում, Արմայիս ձեւը նոյնական է լիկիական, յունական գրչութեամբ աւանդուած, Armais անուանը, որը նոյնպէս յանգեցում է խեթալուվիական Armas «լուսին, լուսնաստուած» անուանը⁵ (վերջին սն ուղղական հոլովի վերջաւորութիւնն է): Նշենք, որ Արմաիրի անուանադրի (eponym) անուան առաջին մասը եւս պէտք է լինէր Արմ- եւ ոչ Արամ- (Արամանեակի եւ Արամայիսի ձեւերի երկրորդ ան, հաւանաբար, ազգածին աւանդութեան առանցքային հերոսներ Արամի եւ Արայի անունների ազդեցութեան արդիւնք են, իսկ յունաստիպ -իս վերջաւորութիւնը, հնարաւոր է՝ արհեստական, կամ լիկիական Արմաիրի մի գուգահեռը լինել, յայտնի Խորենացուն կամ նրա յունական սկզբնաղբիւրին): Այս ստուգաբանութեան օգտին կարելի է աւելացնել, որ հին հայկական աւանդութեան մէջ լուսնի պաշտամունքը յիշում է միայն մէկ անգամ, Արմաիրում (Խորենացի Բ. ը, Ժբ.): Վաղարշակ արքան այստեղ արեւին, լուսնին եւ իր նախնիներին նուիրուած տաճար է կառուցում, որի՝ արեւի ու լուսնի արձանները յետագա-

յում փոխարինում են իրենց յունական համապատասխանությունների՝ Տիր-Ապոլոնի եւ Անահիտ-Արտեմիսի հելլենիստական արձաններով⁶:

Չի կարելի պնդել, որ *arma-* «լուսին» եզրը ծագումով բնիկ անատոլիական-փոքրասիական՝ իտեթալովիական է: Այն չունի հնդեւրոպական զուգահեռներ եւ, ամենայն հաւանականութեամբ, տեղական, ենթաշերտային ծագում ունի⁷: Ակնյայտօրէն ոչ-հնդեւրոպական է նաեւ իտեթ. *per/pir* «տուն» բառը, եգիպտական *pr* եւ խուռիական *pur(1)* խոյնիմաստ զուգահեռներով⁸: Այսպիսով, չնայած Արմաիի իտեթական ծագման հնարաւորութեանը, հաւանական է նրա նաեւ այլ ծագումը (անուան երկու բաղադրիչներն էլ հնդեւրոպական չեն):

Ըստ Խորենացու, այլ ազգերը սկսում են հայերին կոչել արմէն եւ նման անուանումներով՝ Արամ նահապետի անունից, իսկ Մեբեոսի գրքում որպէս այդ ցեղանուան անուանադիր է հանդէս գալիս Ար(ա)-մանեակը⁹: Ար(ա)մանեակը, Ար(ա)մայիսը եւ Արամը հայոց ազգածին առասպելի առանցքային կերպարներից են: Նրանք, հենց առասպելի եզրաբանութեամբ, «ազգածին» նահապետեր են, եւ նրանց անունների ար(ա)մ տարրն ակնարկում է, ակնյայտօրէն, արմէն ցեղանունը: Ի միջի այլոց, Արամի հօր անունն է Հարմա. այսպիսով, այդ անուանաբանական տարրը առասպելում կրում են չորս նահապետեր, բոլոր դիցաբանական նահապետերի կէտը (միւսներն են Հայկը, Ամասիան, Գեղամը եւ Արան): Ըստ այդմ, արմէն ցեղանունը կարող է կապուել նաեւ Արամայիսի, եւ այդպիսով, նաեւ *Arma-* դիցանուան հետ¹⁰: Կարելի է ենթադրել նաեւ, որ Արամը, հայոց անուանադիրն ըստ Խորենացու, նոյնպէս սկզբնապէս կապուած է եղել այս դիցանուան հետ եւ միայն յետագայում է ձեւափոխուել իստոնուելով Ուրարտուի առաջին արքայ Արամուի եւ *Սստուածաշունչ*ում արամէացիների անուանադիր Արամի անունների հետ¹¹: Այս մեկնաբանութիւնը հաւանական է նաեւ լեզուաբանական տեսակէտից՝ արամ- եւ արմ- տարրերի ստուգաբանական կապը հայերէնում դժուար ապացուցելի է:

Արմէն ցեղանունը, ըստ լայնօրէն ընդունուած ստուգաբանութեան, ծագում է Սասունի լեռներում, Մուշից հարաւ գտնուող հնագոյն *Arme* երկրանունից, ուրարտական ածանցով *Arme-ni* «Արմէ (երկրի) բնակիչ», նաեւ «արմէական (երկիր)»¹²:

Ըստ ասորեստանեան աղբիւրների, Հայկական Լեռնաշխարհի հարաւ-արեւմտեան շրջանները Ք.ա. ԺԲ. դարում նուաճուել են մուշկերի, ուրումացիների եւ կաշկացիների (կոչւում են նաեւ արեշլացիներ) ցեղերի կողմից (*mušku, urumaia, kaškaia/abešlaia*)¹³: Ասորեստանեան աւելի ուշ աղբիւրներում մուշկեր են կոչւում նաեւ փոխզացիները եւ, այդ պատճառով, այս վաղ մուշկերին գիտութեան մէջ ընդունուած է կոչել «արեւելեան մուշկեր» (այդ երկուսի նոյնականութիւնը տեսականօրէն հնարաւոր է,

բայց վիճելի): Ուրումացիները եւ կաշկացի/արեշլացիները յիշում են որպէս «խեթական երկրի» ըմբոստ մարդիկ, որոնք «ուժով գրաւել են Շուրարտու երկրի բնակավայրերը» (Շուրարտուն նոյն Շուրբիա երկիրն է Սասունի լեռներում եւ Մուշի դաշտում):

Մուշկերի ցեղանունն հետ է կապուած, հաւանաբար, Մուշ քաղաքի անուանումը (*musk^ho-/ mōsk^ho>Մուշ, սեռ. Մշոյ)¹⁴, ուրումացիների հետ՝ «Ներքին Ուրումու» եւ Ուրմէ երկրները (նոյնպէս Մուշի շրջանում), իսկ Արմէ երկիրը, ինչպէս ասուեց, գտնուել է Մուշից հարաւ (Ուրմէի հարեւանութեամբ, աւելի հարաւ-արեւելք): Այդ բոլոր երկրները մտնում էին Շուրբիայի կազմի մէջ¹⁵: Կաշկացիները կամ կաշկերը, ուրումացիների դաշնակիցները, մի ցեղախումբ էին Խեթական Կայսրութեան հիւսիս-արեւելքում (յետագայ Պոնտոսում, Հայկական Լեռնաշխարհից հիւսիս-արեւմուտք): Նրանց լեզուական պատկանելութեան մասին, նիւթի պակասութեան պատճառով, դժուար է միարժէք կարծիք յայտնել (նրանք յաճախ համարուել են ազգակից խաթերին՝ Փոքր Ասիայի ոչ-հնդեւրոպական հին բնակիչներին, ապա՝ ժամանակակից արխազա-ադրդական ժողովուրդներին, իսկ մի կարծիքի համաձայն՝ արեւմտաքարթուելական մի ցեղ էին): Կաշկերի եւ արեշլացիների ցեղանունները պահպանուած են համարում ժամանակակից հիւսիսարեւմտակովկասեան որոշ ցեղանուններում (հմմտ. հին հայ. Գաշք, հին վրաց. Kašag/k-, բիւզանդ. յուն. Kasachia, հին ռուս. Kosog «չերքէզ», հին յուն. Apsilai, լատ. Absilae, հին հայ. Ափշիլք, հին վրաց. Apšileti, արխազ. a-apswa, a-apšwa «արխազ»¹⁶:

Kaška ցեղանունը, հաւանաբար, կապուած է խաթական լուսնաստծու Kaškui հետ¹⁷: Դա, թերեւս, բոլոր կաշկական ցեղերի խաթական հաւաքական անուանումն է (իսկ արեշլան, հնարաւոր է, ինքնանուանում է, կամ նրանցից մէկի անուանումը)¹⁸: Այդ ցեղանունը կարող է վկայել կաշկերի մօտ լուսնի առանձնայատուկ պաշտամունքի գոյութիւնը: Հելլենիստական դարաշրջանի Պոնտոսում լուսնի աստուած Մէնը նոյնացուել էր Ջեւսի հետ եւ պաշտուում էր որպէս գերագոյն աստուած¹⁹: Հազարամեակներ տեւող լուսնի այս պաշտամունքը եւս կարող է փաստարկ հանդիսանալ կաշկա ցեղանունն «լուսնային» ստուգաբանութեան համար²⁰:

Նոյնիսկ առանց այս դատողութիւնների էլ կարելի է ասել, որ Արմէ երկրանունն եւ փոքրասիական լուսնաստծու arma անունն կապի գաղափարը միանգամայն ընդունելի է: Միւս կողմից, Արմէ, Արմէն, Ար(ա)մանեակ, Ար(ա)մայիս եւ Արմաւիր անունները, դժուար է առանձնացնել Ք.ա. Գ.-Ա. հազարամեակների սեպագիր աղբիւրներում վկայուած բազմաթիւ համահունչ անուանումներից (Arman, Armanum, Armi, Armuna եւն.)²¹: Տեսականօրէն չի կարելի բացառել, որ սրանց գոնէ

մի մասը յանգում է տեղական «լուսին, լուսնաստուած» նշանակութեամբ արմատին, որը փոխառուել էր փոքրասիական եւ, թերեւս, նաեւ այլ հին տեղական լեզուներ:

Պէտք է նշել, որ լուսնի առանձնայատուկ պաշտամունքը բնորոշ է եղել ողջ տարածաշրջանին: Հին վրացական ցեղերի մէջ, ինչպէս Պոնտոսում, գերագոյնն էր լուսնի աստուածը²², Ադուանքում ամենամեծ պաշտամունքն ունէր լուսնի դիցուհին, վկայուած յունական Սելենէ անունով²³, իսկ Հայաստանում՝ Անահիտը²⁴, որը նաեւ լուսնի դիցուհու յատկանիշներ ունէր: Ընդ որում, Հայաստանում, Վրաստանում եւ Ադուանքում ի յայտ է գալիս լուսնաստծու՝ դիցարանի մեծ աստուածների եռեակի անդամ լինելը (ուր գերագոյն աստուածը շրջապատուած էր արեւի եւ լուսնի աստուածներով): Կաշկերը, վրացիները, հայերը եւ ադուանները լեզուական առումով, գոնէ հիմնականում, ոչ-ազգակից ժողովուրդներ են: Ըստ այդմ, լուսնի այս առանձնայատուկ պաշտամունքը, որպէս մեծ աստուած եւ մեծ աստուածների եռեակի անդամ, ունի տեղական, տարածաշրջանային արմատներ:

Այսպիսով, հայերին օտարների կողմից տրուող արմէն ցեղանունան համար առաջարկուում է նոր ստուգաբանութիւն՝ *arma* «լուսին, լուսնաստուած» նշանակութեամբ մի հին տեղական արմատից: Դիցակիր դիցաբանական անուններով ցեղանունները յայտնի են ամէնուրեք: Մեր քննարկած նիւթի համար լուսնային օրինակը Հայաստանի հարեւան հնագոյն կաշկա ժողովրդի ցեղանունն է (տրուած նոյնպէս օտարների կողմից):

ԾԱՆՕԹԱԳՐՈՒԹԻՒՆՆԵՐ

¹ Խորենացի, Ա. Ժ-ժդ, Սեբեոս, Ա.:

² Հնագիտական տուեալների համաձայն, Արմաւիրի բլուրը պաշտամունքային կենտրոն է եղել արդէն Ք.ա. Դ. հազարամեակի վերջից: Ուշ բրոնզի եւ վաղ երկաթի դարաշրջաններում, Ք.ա. Բ. հազարամեակի կէսից, նրա պաշտամունքային նշանակութիւնը մեծանում է, իսկ Արարատեան դաշտի ուրարտական նըւաճումից առաջ (Ք.ա. Թ. դարի վերջ) այն արդէն տարածաշրջանի գլխաւոր կրօնական կենտրոններից մէկն էր: Ուրարտական դարաշրջանում (Ք.ա. Ը.-Է. դդ.) Արմաւիրի բլուրը, իր բազմաթիւ տաճարային եւ այլ պաշտամունքային ու աշխարհիկ կառոյցներով, Արգիշթի Ա.ի կողմից Ք.ա. 776ին կառուցած Արգիշթիխինիլի քաղաքի արեւելեան հատուածի կամ արուարձանի՝ «սրբազան քաղաք»ի կենտրոնն էր: Ուրարտուի անկումից յետոյ Արմաւիրը, մինչեւ Ք.ա. Գ. դար Հայաստանի մայրաքաղաքն էր (Արմաւիրի հնագիտական պատմութեան վերաբերեալ տե՛ս՝ A. Martirosian, *Argishtihinili*, Երեւան, ՀՍՍՀ ԳԱ Հրատ., 1974. նաեւ՝ G. Tiratsyan, “Armawir” *Revue des Études Arméniennes*, T. 27, 1998-2000. նաեւ՝ A. Karapetian, J. Khachatryan, A. Kanetsian, “Urartskii Armavir” (Ուրարտական Արմաւիր), *Istoriko-Filologicheskii Jurnal* 2, 2004, էջ 254-275. նաեւ՝ I. Karapetyan, “The “Susi” Temple of Argistihinili-Armavir”, *Aramazd: Armenian*

Journal of Near Eastern Studies, Vol., 2, 2011, էջ 37-43. նաև՝ Ա. Պետրոսեան, Ն. Տիրացեան, «Արմաւիրը Պաշտամունքային Կենտրոն», *Պատմաբանասիրական Հանդէս*, 1, 2012, էջ 169-184):

- ³ Ա. Պետրոսեան, «Խեթերէնի Հետքեր Հայկական Լեռնաշխարհի Արեւելքում Եւ Հարաւ-Արեւելքում». *Խալդէան Ջորութեամբ... Յօդուածների Ճողովածու Նը-լիրուած Բորիս Պիտրովսկու Օնդեան 100-Սմեակին*, Երեւան, Գիտութիւն Հրատ., 2010, էջ 72-73. հմմտ.՝ G. A. Kapantsian, *Istoriko Lingvisticcheskie Raboty* (Պատմա-լեզուաբանական աշխատանքներ), Vol. II, Երեւան, 1975, էջ 49-50: Անուան երկրորդ մասի ստուգաբանութեան համար հմմտ.՝ Խորենացու (Ա. ժբ) եւ Սեբեոսի (Ա.) վկայութիւնը Արմաւիրի՝ որպէս «տուն բնակութեան» կառու-ցելու վերաբերեալ: Ընդհանրապէս, հայերէնի անատոլիական փոխառութիւն-ները հիմնականում լուվիական են համարուում, բայց լուվիերէնում այս ար-մատը հանդէս է գալիս այլ ձեւով՝ *parna-* (այս ձեւը հանդիպում է նաեւ խեթե-րէնում), եւ Արմաւիրը, այսպիսով, չի կարող լուվիական անուանում լինել:
- ⁴ Պետրոսեան, «Խեթերէնի», էջ 65-77. նաև՝ Պետրոսեան, Տիրացեան. նաև՝ A.Y. Petrosyan, "First Capitals of Armenia and Georgia: Armawir and Armazi (Problems of Early Ethnic Associations)", *Journal of Indo-European Studies* 40, 3-4, 2012, էջ 265-288:
- ⁵ P. Howink ten Cate, *The Luwian Population Groups of Lycia and Cilicia Aspera During the Hellenistic Period*, Leiden, Brill, 1961, էջ 132:
- ⁶ Ա. Պետրոսեան, «Արմաւիր Եւ Արմազի. Հայ-Վրացական Հնագոյն Առնչութիւն-ներ», *Գիտաժողովի Նիւթեր Նուիրուած Մովսէս Խորենացու Օնդեան 1600-Սմեակին*, Վանաձոր, 2011, էջ 67-94. նաև՝ Պետրոսեան, Տիրացեան. նաև՝ Petrosyan, "First Capitals": Արմաւիրի եւ Վրաստանի առաջին մայրաքաղաք Ար-մազիի հիմնադրութեան եւ վաղ պատմութեան առասպելները չափազանց նման են. Արմազիում եւս յայտնի էր լուսնաստծու առանձնայատուկ պաշտա-մունքը (եռամաս տաճարային համալիրում, ամպրոպի եւ արեւի աստուած-ների հետ, ինչպէս Արմաւիրում): Յատկանշական է, որ Արմազին նոյնպէս, ըստ լայնօրէն տարածուած ստուգաբանութեան, կապուած է անատոլիական «լու-սին» արմատի հետ (A.I. Boltunova, "K Voprosu Ob Armazi" (Արմազիի հարցի մասին), *Vestnik Drevney Istorii* 2, 1949, էջ 228-240. նաև՝ G. A. Melikishvili, *Nairy-Urtu*, Tbilisi, Akademia Nauk Gruz. SSR, 1954, էջ 420. նաև՝ G. A. Melikishvili, *K Istorii Drevney Gruzii* (Հին Վրաստանի պատմութեան մասին), Tbilisi, Akademia Nauk Gruz. SSR, 1959, էջ 229. նաև՝ G. A. Melikishvili, O. D. Lordkipanidze. *Ocherki Istorii Gruzii* (Ակնարկներ՝ Վրաստանի պատմութեան), Vol. I, Tbilisi, Metsniereba, 1989, էջ 394-395):
- ⁷ Այսպէս, Թիշլերը, յիշելով բառի հնդեւրոպական մեկնաբանութեան տարբեր փորձերը, թողնում է այն առանց ստուգաբանութեան (J. Tischler, *Hittisches Etymologisches Glossar, Teil I*, Innsbruck, Institut für Sprachwissenschaft der Universität Innsbruck, 1983, էջ 62. հմմտ.՝ T.V. Gamkrelidze, V.V. Ivanov, *Indoeuropeyskii Yazik I Indoeuropeyski* (Հնդեւրոպական լեզուն եւ հնդեւրոպացիք), Tbilisi, Metsniereba, 1984, էջ 685. նաև՝ Puhvel, *Hittite Etymological Dictionary: Trends in Linguistics. Vol. I*, Berlin-New York, de Gruyter 1984, 154 յաջ.):
- ⁸ Tischler, էջ 569 յաջ.:

- ⁹ Գ. Խ. Սարգսեան, «Յատուկ Անունների Ստուգաբանութիւնը Մովսէս Խորենացու Պատմութեան Մէջ», *Պատմաբանասիրական Հանդէս*, 1-2, 1998, էջ 113-128, էջ 123:
- ¹⁰ Ար(ա)մանեակ/Արմենակը կարող էր ձեւաւորուել արմէն ցեղանուան հիման վրայ (նուագական -ակ ածանցով): Սակայն այն, ամենայն հաւանականութեամբ, մի քանի ձեւերի բաղաբառութեան արդիւնք է (A. E. Petrossian, “O Proiskhojdenii Armyanskogo Naroda: Problema Identifikatsii Protoarmyan (Kriticheskii Obzor)” (Հայ ժողովրդի ծագման վերաբերեալ. Վաղնջահայերի նոյնացման խնդիրը. քննական տեսութիւն), *Armyanskii Vestnik*, 2/3-1, 2009, էջ 98ձան.125): Տեսականօրէն հնարաւոր է նրա համար եւս անատոլիական ակունքներ գտնել, հմտ. իւեթ. armanni- «կիսայրուսին», կամ անատոլիական՝ վաղնջական լուվիական Arma-nani «լուսնի (աստծո) եղբայր» անձնանունը (Արմանեակը վերակազմութեան մէջ Արմայիսի երկուորեակ եղբայրն է. Արմանանիակ>Արմանեակ, սղման արդիւնքով (Petrosyan, “First Capitals”, էջ 277ձան.18): Այդ անձնանուան վերաբերեալ տե՛ս՝ E. Laroche, *Les Noms des Hittites*, Paris, 1966, էջ 39): Կան նոյն հիմքով կազմուած նաեւ ուշ փոքրասիական անուններ:
- ¹¹ Արմէն ցեղանուան այդ անունների հետ բաղաբառման վերաբերեալ տե՛ս՝ J. Markwart, “Le Berceau des Arméniens”, *Revue des Etudes Arméniennes* 8, f. 2, 1928, էջ 215, 224:
- ¹² I.M. Diakonov, *Predistoria Armyanskogo Naroda* (Հայ ժողովրդի նախապատմութիւն), Երեւան, ԳԱ Հրատ., 1968, էջ 234 յաջ. ձան. 114: Ցեղանուան այլ մեկնաբանութիւններ տե՛ս՝ Գեորգ Չահուկեան, *Հայոց Լեզուի Պատմութիւն. Նախագրային Ժամանակաշրջան*, Երեւան, ԳԱ Հրատ., 1987, էջ 285 յաջ. նաեւ՝ I.M. Diakonov, “O Samonazvanii Armyanskogo Naroda” (Հայ ժողովրդի ինքնանուան մասին), *Istoriko-Filologicheskii Jurnal*, 2, 2005, էջ 277-278. նաեւ՝ Petrossian, “O Proiskhojdenii”, էջ 74 յաջ., գրականութեամբ:
- ¹³ A. K. Grayson, *Assyrian Royal Inscriptions, Vol. II, part 2*, Վիսպատէն, 1976, էջ 12, 18, 66, 67, 92, 93: Այս ցեղերի վերաբերեալ տե՛ս, օրինակ՝ Diakonov, *Predistoria*, էջ 12, 123 յաջ., 214 յաջ. նաեւ՝ G. G. Giorgadze, “Neindoevropiskie Etnicheskie Gruppy (Khatty, Kaski) V Drevney Anatolii Po Khettskim Klinopisnym Tekstam,” (Հին Անատոլիայի ոչ-հնդեւրոպական էթնիկական խմբերն ըստ իւեթական սեպագիր բնագրերի. իսթեր, կաշկեր) *Rozyskaniya Po Istorii Abkhazii/Gruzii*, Tbilisi 1999, <http://forum.gol.ge/index.php?showtopic=22904&st=560>:
- ¹⁴ A. Y. Petrosyan, “The Indo-European and Ancient Near Eastern Sources of the Armenian Epic”, *Journal of Indo-European Studies Monograph No 42*, Washington DC, Institute for the Study of Man, 2002, էջ 142: Այս տեղանուան կապը սեպագիր muškuի հետ, պարզ համահնչիւնութեան հիմքի վրայ, առաջարկուել է վաղուց (Diakonov, *Predistoria*, էջ 222 յաջ. նաեւ՝ I. M. Diakonoff, “First Evidence of the Proto-Armenian Language in Eastern Anatolia”, *Annual of Armenian Linguistics*, 13, 1992, էջ 51-54. նաեւ՝ Գեորգ Չահուկեան, *Հայերէնը Եւ Հին Հնդեւրոպական Լեզուները*, Երեւան, ԳԱ Հրատ., 1970, էջ 78):
- ¹⁵ Ադրիւրների եւ երկրների տեղայնացման վերաբերեալ տե՛ս՝ N. V. Arutyunian, *Toponimika Urartu* (Ուրարտուի անուանաբանութիւնը), Երեւան, ՀՍՍՀ ԳԱ Հրատ., 1985, էջ 39, 210 յաջ.

- ¹⁶ Melikishvili, *Nairy-Urartu*, էջ 76. նաև՝ Melikishvili, *K Istorii Drevney*, էջ 98. նաև՝ Diakonov, *Predistoria*, էջ 128-129. 7:
- ¹⁷ G.G. Giorgadze, “K Voprosu O Lokalizatsii I Yazikovoy Strukture Kaskkikh Etnicheskikh I Geograficheskikh Nazvanii” (Կաշկական էթնիկական և աշխարհագրական անուանումների տեղայնացման և լեզուական կառուցումների շուրջ), *Peredneaziatskii Sbornik*, I, Մոսկուա, 1961, էջ 199 յաջ.:
- ¹⁸ Կաշկերի վերաբերելով տե՛ս՝ Melikishvili, *Nairy-Urartu*, էջ 73, 410. նաև՝ Giorgadze, “K Voprosu O”. նաև՝ Giorgadze, “Neindoeuropeiskie”. նաև՝ E. von Schuler, *Die Kaškaer*, Berlin, de Gruyter, 1965. նաև՝ I. Singer, “Who were the Kaška?”, *Phasis 10 (II). The Argonautica and World Culture. Greek and Roman Studies*, 2007, էջ 166-181:
- ¹⁹ S. Saprykin, *The Religion and Cults of the Pontic Kingdom: Political Aspects. Mithridates VI and the Pontic Kingdom*, Aarhus, Aarhus University Press, 2009, էջ 258 յաջ.:
- ²⁰ Այդ մասին տե՛ս նաև՝ Giorgadze, “K Voprosu O”, էջ 200: Լուսաստծու առանձնապատուկ պաշտամունքը յիշեցնում է հին արաբական իրականությունը, ուր տարբեր ցեղեր, որպես գերագոյն աստուած, տարբեր անուններով պաշտում էին լուսնաստծուն:
- ²¹ Տե՛ս օրինակ՝ *Répertoire Géographique des Textes Cuneiformes*, I, 18; II, 15; III, 21; V, 38; XII, 50 ff. նաև՝ Arutyunian, էջ 37 յաջ. նաև՝ Petrosyan, “The Indo-European and Ancient Near Eastern”, էջ 163:
- ²² Տե՛ս օրինակ՝ A. I. Boltunova. “K Voprosu Ob Armazi”.
- ²³ Strabo, *Geography* XI.4.7: <http://rbedrosian.com/Classic/strabo11.htm>.
- ²⁴ Նոյն, XI.14.16:

FROM THEONYM TO ETHNONYM: TRACES OF AN ACIENT CULT IN ARMENIA
(SUMMARY)

ARMEN PETROSYAN
alpehist@gmail.com

Armenians call themselves “*Hays*”, while non-Armenians call them “Armenians”.

The author of the article tackles the issue of calling the Armenians “Armen”s through a new approach.

He speculates that the word Armen could have a meaning rather than be considered the name of an ethnic group or its leader.

While he notes that the cult of the moon in Armenia is attested to only once, in Armawir, the oldest capital of Armenia (in a triadic temple along with the royal ancestors and the god of sun), he argues that the name of Armawir can be derived from the Anatolian term for the moon: Arma-pir ‘house (temple) of moon (god)’ (in Hittite). Furthermore, he notes that the name of the Armenian patriarchal figure, Ar(a)mayis, legendary founder of Armawir, coincides with the Lycian personal name Armais (arma- ‘moon, moon god’). Moreover, he underlines the fact that four (out of the eight) names of the Armenian mythological ethnogonic patriarchs – Ar(a)maneak, Ar(a)mayis, Harma, Aram – contain the element ar(a)m-, which is to be associated with the ethnonym (exonym) Armen. Accordingly, he concludes that such an interpretation should be taken into consideration as well, while trying to answer the question of the very naming of Armenians.

